



顧況集卷上

五言古詩

擬古三首

龍劍昔藏影送雄雷其雌人生阻歡會神物亦別
離碧樹感秋落佳人無還期夜琴爲君咽浮雲爲
君滋愛而傷不見星漢徒參差

幽居盼天造胡息運行機春葩妍旣榮秋葉瘁以
飛滔滔川之逝日沒月光輝所貴法乾健于道悟
入微任彼聲勢徒得志方誇毗

浮生果何慕老去羨介推陶令何足錄彭澤歸已

已遲空負漉酒巾乞食形諸詩吾惟抱貞素悠悠
白雲期

棄婦詞

古人雖棄婦棄婦有歸處今日妾辭君辭君欲何
去本家零落盡慟哭來時路憶昔未嫁君聞君甚
周旋及與同結髮值君適幽燕孤魂託飛鳥兩眼
如流泉流泉咽不燥萬里關山道及至見君歸君
歸妾已老物情棄衰歇新寵方妍好拭淚出故房
傷心劇秋草妾以憔悴捐羞將舊物還餘生欲有
寄誰肯相留連空牀對虛牖不覺塵埃厚寒水落
芙蓉秋風墮楊柳記得初嫁君小姑始扶牀今日
君棄妾小姑如妾長回首語小姑莫嫁如兄夫

從軍行二首

弭節結徒侶速征赴龍城單于近突圍烽燧屢夜
驚長弓挽滿月劍華霜雪明遠道百草殞峭覺寒
風生風寒欲砭肌爭柰裘襖輕回首家不見候鴈
空中鳴笳奏還以哀肅肅趣嚴程寄語塞外胡擁
騎休橫行

少年膽氣麤好勇萬人敵伏劍出門去三邊正艱
厄怒目時一呼萬騎皆辟易殺人蓬麻輕走馬汗

血滴醜膚何足清天山坐寧謚不有封侯相徒負
幽并客

塞上曲

黠虜初南下塵飛塞北境漢將懷不平雙管擾當遠
屏金革卧不暖起舞霜月冷點軍三十千部伍嚴
以整酣戰祈成功于焉罷邊釁

嚴公釣臺作

靈芝產遐方威鳳駕重霄嚴公何耿潔託志肩夷
巢漢后雖則貴子陵不知高糠粃世道長揖夔
龍朝掃門彼何人昇降不同朝捨世遂長徃山谷

多清風

弋陽溪中望仙人城

何草乏靈姿無山不孤絕我行雖云蹇偶勝聊換
節上界浮中流光響洞明滅晚禽曝霜羽寒魚依
石髮自有無還心隔波望松雪

奉和同郎中韋使君郡齋雨中宴集

好鳥依嘉樹飛雨灑高城况與數君子列坐分兩
楹文雅一何麗林塘含餘清我公未歸朝游子不
待晴白雲帝鄉遠滄江楓葉鳴拜手欲無言零淚
如酒傾寸心已摧折別離方骨驚安得凌風翰蕭

肅賓天京

謝王郎中見贈琴鶴

此琴等焦尾此鶴方胎生赴節何徘徊感物自
并獨立江海上一彈天地清朱絃動瑤華白羽飄
玉京因想羨門輩眇然四體輕子喬翔鄧林王母
遊層城忽如啓靈署鸞鳳相呼鳴何由玉女牀去
食琅玕英

華山西岡遊贈隱玄叟

群峯鬱初霽潑黛若鬟沐失風鼓唵呀搖撼千灌
木木葉微墮黃石泉淨停綠危磴蘿薜牽迥步入
幽谷我心寄青霞世事慙蒼鹿遂令巢許輩于焉
謝塵俗想是悠悠雲可契去留躅

初秋蓮塘歸

秋光淨無跡蓮消錦雲紅只有溪上山還識揚舠
翁如何白蘋花幽渚笑涼風

長安竇明府後亭

君爲長安令我美長安政五日一朝天南山對明
鏡鳥飛青苔院水木相輝映客至南薰鄉絲桐展
歌詠吏人何肅肅終歲無喧競欲識明府賢邑中
多百姓

和翰林吳舍人兄弟西齋

君家誠易知易知復難同新裁一尺詔早入明光
宮西齋何其高上與星漢通永懷洞庭石春色相
玲瓏又懷巴峽泉夜落君絲桐信是怡神所迢迢
蕤華嵩鳥飛晴雲滅疊嶂盤虛空君家誠易知易
知意難窮

從江西至彭蠡入浙西淮南界道中寄齊

相公

大賢舊丞相作鎮江上雄自鎮江上來何人得如
公處士待徐孺仙人期葛洪一身控上遊八郡趨

下風比屋除畏溺林塘曳煙虹生人罷虔劉井稅
均以克大府肅無事歡言接悲翁心清百丈泉目
送孤飛鴻數年鄱陽掾抱責棲微躬首陽及汨羅
無乃偏其衷楊朱并阮籍未免哀途窮四賢雖得
仁此怨何忽忽老氏齊寵辱於陵一窮通本師留
度門平等寃親同能依二諦法了達三輪空真境
靡方所出則內外中無邊盡未來定惠雙修功蹇
步慙寸進飾裝隨轉蓬朝行楚水陰夕宿吳洲東
吳洲覆白雲楚水飄丹楓晚霞燒迴潮千里光曠
曠莫開海上影桂吐淮南鼓何當翼明庭草木生

春融

七言古詩

公子行

輕薄兒面如玉紫陌春風纏馬足雙鞞懸金縷鶻
飛長衫刺雪生犀束綠槐夾道陰初成珊瑚幾節
流星紅肌拂拂酒光凝當街背拉金吾行朝遊
鼕鼕鼓聲發暮遊鼕鼕鼓聲絕入門不肖自升堂
美人扶踏金堦月

幽居弄

苔衣生花露滴月入西林蕩東壁扣商占角兩三
聲洞戶深窓一冥寂獨去滄洲無四鄰身嬰世網
此何身關情命曲寄惆悵久別山南山裏人

行路難二首

君不見見擔雪塞井徒用力炊沙作飯豈堪喫一生
肝膽向人盡相識不如不相識冬青樹上掛凌霄
歲晏花凋樹不凋凡物多自有根本種禾終不生
荳苗行路難行路難何處是平道中心無事當富
貴今日覺君顏色好

君不見少年頭上如雲髮少壯如雲老如雪豈知
灌頂有醍醐能使清涼頭不熱呂梁之水掛飛流

龜龜蛟虺不敢遊少年恃險若平地獨倚長劍凌
清秋行路難行路難昔少年今已老前朝竹帛事
皆空日暮牛羊古城草

悲歌 并序

情思發動聖賢所不免也故師乙陳其宜延陵審
其音理亂之所經王化之所興信無逃于聲豈徒
文彩之麗耶遂作歌以悲之

邊城路今人犁田昔人墓岸上沙昔時江水今人
家今人昔人共長嘆四氣相催節迴換明月皎皎
入華池白雲離離度青漢

短歌行

我欲昇天天隔霄我欲渡水水無橋我欲上山山
路險我欲汲井井泉遙越人翠被今何夕獨立沙
邊江草碧紫燕西飛欲寄書白雲何處蓬萊客

遠思曲

新繫青絲百尺繩心在君家轆轤上我心皎潔君
不知轆轤一轉一惆悵何處春風吹曉幕江南淥
水通朱閣美人二八顏如花泣向春風畏花落臨
春風聽春鳥別時多見時少愁人一夜不得眠瑤
井玉繩相對曉

攀龍引

軒轅黃帝初得仙鼎湖一去三千年周流三十六
洞天洞中日月星辰聯騎龍駕景遊八極軒轅弓
劍無人識東海青童寄消息

春草謠

春草不解行隨人上東城正月二月色綿綿千里
萬里傷人情

八月五日歌

四月八日明星出摩耶夫人降前佛八月五日佳
氣新昭成太后生聖人開元九年燕公說奉詔聽

置千秋節丹青廟裏貯姚宋花萼樓中宴歧薛清
樂靈香幾處聞鸞歌鳳吹動祥雲已於武庫見靈
鳥仍向晉山逢老君率土普天無不樂河清海晏
窮寥廓梨園子弟傳法曲張果先生進仙藥玉座
淒涼遊帝京悲翁回首望承明雲韶九奏杳然遠
唯有五陵松柏聲

露清竹杖歌

鮮于仲通正當年章仇兼瓊在蜀川約束蜀兒採
馬鞭蜀兒採鞭不敢眠橫截斜飛飛鳥邊繩橋夜
上層崖顛頭插白雲 飛泉採得馬鞭長且堅浮

漚丁子珠聯聯灰煮蠟楷光爛然章仇兼瓊持上
天上天雨露何其偏飛龍閭厩馬數千朝飲吳江
夕秣燕紅塵撲轡汗濕韉獅子麒麟聊比肩江面
昆明洗刷牽四蹄踏浪頭天蛟龍稽顙河伯虔
拓羯胡雛脚手鮮陳閱韓幹丹青妍欲邈未貌眼
欲穿金鞍玉勒錦連乾騎入桃花楊柳煙十二樓
中奏管絃樓中美人奪神仙爭愛大家把此鞭祿
山入關關破年忽見楊州北邙前祗有人還千一
錢亭亭筆直無皺節磨將形相一條鐵市頭格是
無人別江梅賤臣不拘綆垂牕掛影西窓缺稚子
覓衣桃仰穴家童拾薪幾拗折玉潤猶沾玉壘雪
碧鮮似染萋弘血蜀帝城邊子規咽相如橋上文
君絕往年策馬降至尊七盤九折橫劍門穆王八
駿超崑崙安用舟舟孤山根聖人不貴難得貨金
玉珊瑚誰買息

金璫玉珮歌

贈君金璫太霄之玉珮金鎖禹步之流珠五嶽真
君之秘籙九天文人之寶書東并沐浴辰已畢先
進洞房上奔日借問君欲何處來黃姑織女機邊
出

日晚歌

日窅窅兮下山望佳人兮不還花落兮屋上草生
兮階間日日兮春風芳菲兮欲歇老不可兮更少
君胡爲兮輕別

瑤草春 并序

隴西李迅者納別宅監奴出迅不喜欲訪故人爲
刺史強而配焉旣歸而不合監奴投井而死因作
瑤草春歌以悲之

瑤草春杳容與江南艷歌京西舞執心輕子都信
節冠秋胡議以腰支嫁時論自有夫蟬髮蛾眉明
井底燕裾趙袂縈轆轤李生聞之淚如綆不忍回
頭看此井月中桂樹落一枝池上鷓鴣啖孤影露
桃穠李自成蹊流水終天不向西翠帳綠窓寒寐
錦茵羅薦夜凄凄瑤草春丹井遠別後相思意深
淺

劉禪奴彈琵琶歌

樂府只傳橫吹好琵琶寫出關山道羈鴻出塞繞
黃雲邊馬仰天嘶白草明妃怨中漢使迴蔡琰愁
處胡笳哀神鬼知妙欲收嚮陰風切切四面來李
陵寄書別蘇武自有人生無此苦當時若值霍嫖

姚滅盡烏孫奪公主

顧况集卷上

吳時用書黃
烟賢金賢刻

顧况集卷下

五言律詩

洛陽早春

何地避春愁終年憶舊遊一家千里外百舌五更
頭客路偏逢雨鄉山不入樓故園桃李月伊水向
東流

步虛詞

迥步遊三洞清心禮七真飛符超羽翼焚火醮星
辰殘藥沾鷄犬靈香出鳳麟壺中無窄處願得一
容身

鄱陽大雲寺一公房

盡日陪遊處斜陽竹院清定中觀有漏言外證無
生色界聊傳法空門不用情欲知相去近鐘鼓兩
聞聲

送友失意南歸

衣揮京洛塵完璞伴歸人故國青山徧滄江白髮
新隣荒收酒幔屋古布苔茵不用通名姓漁樵共
主賓

南歸

老病力難任猶多鏡雪侵鱸魚消宦况鷗鳥識歸
心急雨江帆重殘更驛樹深鄉關殊可望漸漸入
吳音

閒居自述

榮辱不關身誰爲踈與親有山堪結屋無地可容
塵白髮偏添壽黃花不笑貧一樽朝暮醉陶令果
何人

五言排律

寄江南鶴林寺石冰上人

山川重復出心地閣相逢忽憶秋江月如聞古寺
鐘湖平南北岸雲抱兩三峰定力超香象真言攝

毒龍風中何處鶴石上幾年松爲報煙霞道人間
共不容

樂府

暖谷春光至宸遊近旬榮雲隨天仗轉風入御簾
輕翠蓋浮佳氣朱樓倚太清朝臣冠劔退宮女管
絃迎細草承雕輦繁花入幔城文房開聖藻武衛
宿天營玉醴隨觴至銅壺逐漏行五星含土德萬
姓徹中聲親祀先崇典躬推示勸耕國風新正樂
農器近銷兵道德關河固刑章日月明野人同鳥
獸率舞感昇平

送從兄奉使新羅

六氣銅渾轉三光玉律調河宮清奉燹海岳晏來
朝地接提封入天平賜貢饒揚威輕破虜柔服耻
征遼曙色黃金闕寒聲白鷺潮樓船方習戰驄馬
是嘉招帝女飛嘶石鮫人賣淚綃管寧雖不偶徐
稚倘相邀獨島懸空翠孤霞上次寥蟾蜍同漢月
蟠竦異秦橋水豹橫吹浪花鷹迴拂霄晨裝凌渺
漭夜泊記招搖幾路通玄嶠何山是沃焦颶風晴
自起陰火暝潛燒鬢髮成新髻人參長舊苗扶桑
迎日近折柳帶津遙夢向愁中積魂當別處銷臨

廣沙集卷下
川思結網見彈欲求鷗共散羲和曆誰差甲子朝
滄波伏忠信譯語辨謳謠疊鼓鯨鱗隱陰帆鷁首
飄南溟垂大翼西海飲文鯨指景尋靈草排雲聽
洞簫封侯萬里外未肯後班超

七言律詩

送大理張卿

春色依依傷解携月卿今夜泊隋堤白沙洲上江
籬長綠樹村邊謝豹啼遷客本來無倚仗故人相
去隔雲泥越禽唯有南枝分目送歸鴻飛向西

宿湖邊山寺

群峰過雨澗淙淙松下扉扃白鶴雙香透經牕籠
檜栢雲生梵宇濕旛旌蒲團僧定風過席葦岸漁
歌月墮江誰悟此生同寂滅老禪慧力得心降

湖南客中春望

鳴鴈嘹嘹北向頻淶波何處是通津風塵海內憐
雙鬢涕淚天涯慘一身故里音書應望絕異鄉景
物又更新便拋印綬從歸隱吳渚香萼漫吐春

閒居懷舊

日長鼓腹愛吾廬洗竹澆花興有餘騷客空傳成
相賦晉人已負絕交書貧居謫所誰推轂仕向侯

門耻曳裾今日思來總皆罔汗青功業又何如

五言絕句

憶鄱陽舊遊

悠悠南國思夜向江南泊楚客斷腸時月明楓子落

春懷

園鶯啼已倦樹樹墮香紅不是春相肯當由已自翁

洛陽陌二首

鶯聲滿御堤隄拂柳絲齊風送名花落香紅襯馬

蹄

珂珮逐鳴騶王孫結伴遊金丸落飛鳥乘興醉青樓

寄淮上柳十

葦蕭中闌戶相映綠淮流莫訝春潮濶鷗邊可泊舟

送李泌

昔別吳堤雨春帆去較遲江波千里綠

山中夜宿

涼月掛層峯
蘿牀落葉重
掩關深畏虎
風起撼長松

登樓

高閣成長望
江流鴈叫哀
淒涼故吳事
麋鹿走荒臺

江上

江清白鳥斜
蕩槳罾蘋花
聽唱菱歌晚
迴塘月照沙

溪上

採蓮溪上女
舟小怯搖風
驚起鴛鴦宿
水雲撩亂

紅

田家

帶水摘禾穗
夜搗具晨炊
縣帖取社長
嗔恠見官遲

宿山中僧

不爇香爐煙
蒲團坐如鐵
嘗想同夜禪
風墮松頂雪

梅灣

白石盤盤磴
清香樹樹梅
山深不吟賞
姑負委蒼苔

六言絕句

思歸

不能經綸大經甘作草莽閒臣青鎖應須長別白
雲漫與相親

歸山作

心事數莖白髮生涯一片青山空林有雪相待古
道無人獨還

過山農家

板橋人渡泉聲荈簷日午鷄鳴莫嗔焙茶煙暗却
喜曬穀天晴

七言絕句

宮詞

玉樓天半起笙歌風送宮嬪笑語和月殿影開聞
夜漏水晶簾捲近秋河

桃花曲

魏帝宮人舞鳳樓隋家天子泛龍舟君王夜醉春
眠晏不覺桃花逐水流

宿昭應

武帝祈靈太乙壇新豐樹色遶千官那知今夜長
生殿獨閉空山月影寒

憶故園

惆悵多山人復稀
杜鵑啼處淚沾衣
故園此去千餘里
春夢猶能夜夜歸

聽角思歸

故園黃葉滿青苔
夢後城頭曉角哀
此夜斷腸人不見
起行殘月影徘徊

湖中

青草湖邊日色低
黃茆嶂裏鷓鴣啼
丈夫飄泊今如此
一曲長歌楚水西

江村亂後

江村日暮尋遺老
江水東流橫浩浩
竹裏閒窓不見人
門前舊路生青草

江上故居

家在雙峰蘭若邊
一聲秋磬發孤煙
山連極浦鳥飛盡
月上青林人未眠

題葉道士山房

水邊楊柳赤欄橋
洞裏神仙碧玉簫
近得麻姑書信否
潯陽江上不通潮

山中

野人愛向山中宿
況在葛洪丹井西
庭前有箇長

松樹夜半子規來上啼

聽子規

棲霞山中子規鳥口邊血出啼不了山僧後夜初入定聞似不聞

王郎中席歌妓

柳拂青樓花滿衣能歌宛轉世應稀空中幾處聞清響欲遶行雲不遣飛

竹枝詞

帝子蒼梧不復歸洞庭葉下楚雲飛巴人夜唱竹枝後腸斷曉猿聲漸稀

貽朱放

野客歸時無四隣黔婁別久案常貧漁樵舊路不堪入何處空山猶有人

山僧蘭若

絕頂茅菴老此生寒雲孤木伴經行世人那得知幽徑遙向青峰禮磬聲

送柳宜城葬

鳴笳已逐春風咽匹馬猶依舊路嘶遙望柳家門外樹恐聞黃鳥向人啼

短歌行

何處春風吹曉幕江南淥水通朱閣美人二八顏
如花泣向春風畏花落

顧況集卷下

韓君平集卷上

五言古詩

令狐員外宅宴寄中丞

寒色凝羅幕同人清夜期玉杯留醉處銀燭送歸
時獨坐隔千里空吟對雪詩

褚主簿宅會畢庶子餞員外郎使君

開甕臘酒熟主人心賞同斜陽踈竹上殘雪亂天
中更喜宣城印朝廷與謝公

送李明府赴滑州

渭城寒食罷送客歸遠道烏帽背斜暉青驪踏春

草酒醒孤燭夜衣冷千山早去事沈尚書應憐詞賦好

送李司直赴江西使幕

歛板辭漢廷進帆歸楚幕三江城上轉九里人家
泊好酒近宜城能詩謝康樂雨晴山西樹日出南
昌郭竹露點衣巾湖煙濕扇鑰主人蒼玉佩後騎
黃金絡高祝領八州相期同一鶚行當報知已從
此飛寥廓

祭嶽回重贈孟都督

封作天齊王清祠太山下魯公秋賽畢曉日回高
駕從騎盡幽并同人皆沈謝自矜文武足 醉寒

溪夜

送南少府歸壽春

人言壽春遠此去先秋到孤客小翼舟諸生高翅
帽淮風生竹簟楚雨移茶竈若上八公山題詩一
相報

贈別崔司直赴江東兼簡常州獨孤使君

愛君青袍色芳草能相似官重法家流名高墨曹
吏春衣淮上宿美酒江邊醉楚酪沃雕胡湘羹糝
香餌前朝山水國舊日風流地蘇山逐青驄江家

驅白鼻右軍尚少年三領東方騎亦過小丹陽應
知百城貴

七言古詩

送客之江寧

春流送客不應賒南入徐州見柳花朱雀橋邊看
淮水烏衣巷裏問王家千閭萬井無多事關戶開
門向山翠楚雲朝下石頭城江鷺雙飛瓦棺寺吳
士風流甚可親相逢嘉賞日應新從來此地夸羊
酪自有尊羹定卻人

送山陰姚丞攜妓之任兼寄山陰蘇少府

東風香草路南客心容與白晷吳王孫青娥柳安
女都門數騎出河口片帆舉夜簟眠橘洲春衫傍
楓嶼山陰政簡甚從容到罷唯求物外蹤落日花
邊剡溪水晴煙竹裏會稽峯才子風流蘇伯玉同
官曉暮應相逐加食共愛鱸魚肥醒酒仍憐甘蔗
熟知君鍊思本清新季子如今德有鄰他日如尋
始寧墅題詩早晚寄西人

和高平朱參軍思歸作

髯參軍髯參軍身為北州吏心寄東山雲坐見萋
萋芳草綠遙思往日晴江曲刺船頻向剡中回捧

被曾過越人宿花裡鶯啼白日高春樓把酒送車
螯狂歌好愛陶彭澤佳句唯稱謝法曹平生樂事
多如此忍爲浮名隔千里一鴈南飛動客心思歸
何待秋風起

贈別成明府赴劍南

朝爲三室印晚爲三蜀人遙知下車日正及巴山
春縣道橘花裏驛流江水濱公門輒無事賞地能
相親解衣初醉綠芳夕應採蹲鴟薦佳客霽光遠
映西川時間望碧雞飛古祠愛君樂事佳興發天
外銅梁多夢思

送孫潑赴雲中

黃驄少年舞雙戟目視旁人皆辟易百戰能誇隴
上兒一身復作雲中客寒風動地氣蒼茫橫吹先
悲出塞長敲石軍中傳夜火斧冰河畔汲朝漿前
鋒直指陰山外虜騎紛紛膽應碎匈奴破盡看
歸金印酬功如斗大

送客還江東

還家不落春風後數日應沾越人酒池畔花深闔
鴨欄橋邊雨洗藏鴉柳遙憐內舍看新衣復向鄰
家醉落暉把手聞歌香橘下空山一望鷓鴣飛

送夏侯侍郎

元戎車右早飛聲御史府中新正名翰墨已齊鍾
大理風流好繼謝宣城從軍曉別龍驤幕六騎先
驅嘶近郭前路應留白玉臺行人輒美黃金絡使
君下馬愛瀛洲簡貴將求物外遊聽訟不聞烏布
帳迎賓暫着紫綈裘公庭日夕羅山翠功遂心間
無一事移書或問島邊人立仗時呼鈴下吏事業
初傳小夏侯中年劍笏在西州浮雲飛鳥兩相忘
他日依依城上樓

送李湜下第歸衛州便遊河北

莫嗟太常屈便入蘇門嘯道在應未遲勿作我身
料輕雲日下不成陰出對流芳攪別心萬雉城東
春水濶千人鄉北晚花深舊竹青青常繞宅到時
踈曠應自適佳期縱得上宮遊旅食還爲北邙客
路出司州勝景長西山翠色帶清漳仙人磯近菜
萸澗銅雀臺臨野馬岡屢道主人多愛士何辭策
馬千餘里高譚魏國訪先生修刺平原過內史一
舉青雲在早秋恐君從此便淹留
有錢莫向河間用載筆須來闕下遊

張山人草堂會王方士

嶼花晚山日長蕙帶麻襦食草堂一片水光飛入
戶千竿竹影亂登墻園梅熟家醞香新濕頭巾不
復簪相看醉倒臥藜牀

送修縣劉主簿楚

起家得事平原侯晚出都門歸舊游草色連綿幾
千里青驪蹀躞路旁子花深近縣宿河陽竹映春
舟渡淇水鄴下淹留佳賞新群公舊日心相親金
盤曉鱠朱衣鮒玉簾宵迎翠羽人王程書使前期
促他日應知舉鞭速寒水浮瓜五月時把君香袖
長河曲

題玉山觀禪師蘭若

玉山宴坐移年月錫仗承恩詣丹闕先朝親與會
龍華紫禁鳴鍾白日斜宮女焚香把經卷天人就
席禮袈裟禪牀久臥虎溪水蘭若初聞鳳城裏不
出囂塵見遠公道成何必青蓮宮朝持藥鉢千家
近暮倚繩牀一室空掖垣揮翰君稱美遠客陪遊
問真理薄宦深知誤此心回心願學雷居士

贈別上元主簿張著

上書一見平津侯劔笏斜齊秣陵尉朝垂綬帶迎
遠客暮鎖印囊呼上吏長樂花深萬井時同官無

事有歸期回船對酒三生渚繫馬焚香五願祠日
日澄江帶山翠綠芳都在經過地行人看射領軍
堂遊女題詩光宅寺風流才調愛君偏此別相逢
定幾年惆悵浮雲迷遠道張侯樓上月娟娟

別汜水縣尉

未央宮殿金開鑰詔引賢良卷珠箔花間賜食近
丹墀煙裏揮毫對青閣萬年枝影轉斜光三道先
成君激昂谷永直言身不顧郊詵高地轉名香綠
槐陰陰出關道上有蟬聲下秋草奴子平頭駿馬
肥少年白晷登王畿五侯客舍偏留宿一縣人家

爭看歸南向千峰北臨水佳期賞地應窮此賦詩
或送鄭行人舉酒常陪魏公子自憐寂寞會君稀
猶着前時博士衣我欲低眉問知己若將無用廢
東歸

別李明府

寵光五世腰青組出入珠官引簫鼓醉舞雄王玳
瑁牀嬌嘶駿馬珊瑚柱胡兒夾鼓越婢隨行捧玉
盤嘗荔枝羅山道士請人送林邑使臣調象騎愛
君一身遊上國闕下名公如舊識萬里初懷印綬
歸湘江過盡嶺花飛五侯焦石烹江筍千戶沉香

染客衣別後想君難可見蒼梧雲裏空山縣漢苑
芳菲入夏蘭待君障日蒲葵扇

送中兄典邵州

官騎連西向楚雲朱軒出餞畫紛紛百城兼領安
南國雙筆遙揮左君一路諸侯爭館穀洪池高
會荆臺曲玉顏送酒銅鞮歌金管留人石頭宿北
鴈初回江燕飛南湖春暖着春衣湘君祠對空山
掩漁父焚香日暮歸百事無留到官後重門寂寂
垂高柳零陵過贈石香溪洞口人來飲醇酒登樓
暮結邵陽情萬里蒼波煙靄生他日新詩應見報

還如宣遠在安城

送萬巨

漢相見王陵揚州事張禹風帆木蘭曳水國蓮花
府百丈清江十月天寒城鼓角曉鍾前金鑪促膝
諸曹吏玉管繁聲美少年有時過向長干地遠對
湖光近山翠好逢南苑看人歸也向西池留客醉
疎柳垂煙橘帶霜朝游石渚暮橫塘紅牋色奪風
流座白紵詞傾翰墨場夫子前年入朝後高名籍
籍時賢口共憐詩興轉新清繼遠家聲在此身屈
指待爲青鎖客回頭莫羨白亭人

送巴州楊使君

白雲縣北千山口青歲欲開殘雪後前驅錦帶魚
皮鞮側佩金璋虎頭綬南鄭侯家醉落暉東關陌
上着鞭歸愁看野馬隨官騎笑取秦人帶客旗使
者下車憂疾苦家吏銷聲出公府萬里歌鍾相慶
時巴童聲節渝兒舞

送王侍御赴江西兼寄李袁州

中朝理章服南國隨旌旆臘酒湘城隅春衣楚江
水垂簾白角簾下筇鱸魚鱸雄筆佐名公虛舟應
時輩按俗承流幾路清平明山靄春江雲盜城詩

贈魚司馬汝水人逢王右軍綠蘋白芷遙相引孤
興幽尋知不近井上銅人行見無湖中石燕飛應
盡禮門前直事郎腰垂青綬領宜陽花間五馬
迎君日雨霽煙開玉女岡

寄雍江竇明府

少年結綬騁金羈許下如看瓊樹枝入里親過朗
陵伯出門高視穎川兒西遊太府東乘傳泗上諸
侯誰不羨時輩寧將白筆期高流竚向丹青見何
事翻飛不及群虎班突騎來紛紛吳江垂釣楚山
醉身寄滄波心白雲中歲湖塵靜如掃一官又罷

行將老薛公薦士得君初
領黃金千室餘機盡
獨親沙上烏家貧唯愛釜中魚

出重門煙樹裏感物吟詩對暮天
懷人倚杖臨秋水
別離幾日問前期鳴鴈亭邊人去時
獨坐不堪朝與夕
高風蕭索亂蟬悲

贈兗州孟都督

少年親事冠軍侯中歲仍遷北兗州
露冕寧誇漢車服下帷常討魯
春秋後齋草色連高閣事簡人
稀獨行樂閒心近掩陶使君
詩興遙齊謝康樂遠山重疊水
逶迤落日東城間望時不見雙
親辨豐膳能留五馬盡佳期
北場爭轉黃金勒愛客華亭
賞秋色卷簾滿地鋪氍毹
吹角鳴絃開玉壺願學平原
十日飲此時不忍歌驪駒

留別孟都督

平蕪霽色寒城下美酒百壺爭
勸把連呼寶劍銳頭兒少駐
金羈大頭馬一飲留歡分有餘
寸心懷思復何如他時相憶如
相問青鎖門前開素書

送別鄭明府

長頭大鼻鬢如雪早歲連兵劍
鋒折千金盡去無斗儲雙袖破
來空百結獨戀郊扉已十春
高陽酒

徒連此身路傍誰識鄭公子谷口應知漢逸人兒
女相悲探井臼前功豈在他人後勸君不得學淵
明且策驢車辭五柳

贈別王侍御赴上都

翩翩馬上郎執簡佩銀章西向洛陽歸鄩杜回頭
結念蓮花府朝辭芳草萬歲街暮宿春山一泉塢
青青樹色傍行衣乳燕流鶯相間飛遠過三峰臨
八水幽尋佳賞偏如此殘花片片細柳風落日踈
鍾小槐雨相思掩泣復何如公子門前人漸踈幸
有心期當小暑葛衣紗帽望回車

贈別太常李博士兼寄兩省舊遊

兩年戴武弁趨侍明光殿一朝簪惠文客事信陵
君簡異當朝執香非寓直薰差肩何記宦携手李
將軍玉鐙初回酸棗館金鈿正舞石榴裙忽驚萬
事隨流水不見雙旌逐塞雲感舊撫心多寂寂與
君相遇頭初白暫誇五首軍中詩還憶萬年枝下
客昨日留歎今送歸空披秋水映斜暉閒吟佳句
對孤鶴惆悵寒霜落葉稀

寄哥舒僕射

萬里長城家一生唯報國腰垂紫文綬手控黃金

勒高視黑頭翁遙吞白騎賊光摩牙門將轉闔黃
河北帳下親兵皆少年錦衣承日繡行纏轆轤寶
劍初出鞘宛轉角弓初上弦步人抽箭大如笛前
把兩矛後雙戟左盤右射紅塵中鶻入鴉群有誰
敵殺將破軍白日餘回船舞旆北風初郡公循鼻
好磨墨走馬為君飛羽書

贈別華陰道士

紫府先生舊同舍腰垂彤管貯靈藥耻論方士小
還丹好飲仙人太玄酪芙蓉山頂玉池西一室平
臨萬仞溪晝灑瑤臺五雲濕夜行金燭七星齊回
身暫下青冥裏方外相尋有知己賣鮓市中何許
人釣魚坐上誰家子青青百草雲臺春煙駕霓衣
白角巾露葉獨歸仙掌去回風片雨謝時人

送崔秀才赴上元兼省叔父

寒塘歛暮雪臘鼓迎春早疋馬五城人重裘千里
道淮山輕露濕江樹狂風掃楚縣九醞醲揚州白
花好練湖東望接雲陽女市西游入建康行樂遠
誇紅布旆風流近睹紫香囊詩家行輩如君少極
目苦心懷謝眺煙開日上版橋南吳岫青青出林
表

韓君平集卷上

韓君平集卷中

五言律詩

贈別韋兵曹歸池州

南陵八月暮天色遠峰前楚竹青陽路吳江赤馬
船簾金諸客貴佩玉主人賢終日應相逐歸期定
幾年

寄武陵李少府

小縣春山口公孫吏隱時楚歌催晚醉蠻語入新
詩桂水遙相憶桃源暗有期郢門千里外莫恠尺
書遲

韓君平集卷中
贈張建

結客平陵下當年倚俠遊
傳看轆轤劍醉脫驪驪
表翠羽雙鬟妾珠簾百尺樓
春風坐相待晚日莫淹留

送監軍李判官

上客佩雙劍東城喜再游
舊從張博望新事鄭長
秋踏水回金勒看風試錦裘
知君不久住漢將掃旄頭

送客歸廣平

家在趙邯鄲歸心輒自歡
晚杯狐腋暖春雪馬毛
寒孟月途中破輕冰水上殘
到時楊柳色柰向故園看

送張儋木路歸北海

千里東歸客孤心憶舊遊
片帆依白水高枕臥青
州栢寢寒蕪變梧臺宿水收
知君心興遠每上海邊樓

送故人歸魯

魯客多歸興居人悵別情
雨餘衫袖冷風急馬蹄
輕秋草靈光殿寒雲曲阜城
知君親覲後少婦下機迎

送故人歸蜀

一騎西南遠翩翩入劔門客衣筒布潤山舍荔枝
繁古廟祠金馬春江釣白黿自應成旅逸愛客有
王孫

酬程延秋夜即事見贈

長簾迎風早空城澹月華星河秋一鴈砧杵夜千
家節候看應晚心期臥亦賒向來吟秀句不覺已
鳴鴉

送郭贊府歸淮南

駿馬淮南客歸時引望新江聲六合暮楚色萬家
春白苧歌西曲黃苞寄此人不知心賞後早晚從
行塵

題龍興寺澹師房

雙林彼上人詩興轉相親竹裏經聲晚門前山色
春卷簾苔點淨下筋藥苗新記取無生理歸來問
此身

送客遊江南

南使孤帆遠東風任意吹楚雲殊不斷江鳥暫相
隨月淨鴛鴦水春生荳蔻枝賞稱佳麗地君去莫
應知

送高員外赴淄青使幕

遠水流春色回風送落暉人趨雙節近馬過百花
歸山驛嘗官酒關城度客衣從來赤管筆提向幕
中稀

尋胡處士不遇

到來心自足不見亦相親說法思居士忘機憶丈
人微風吹藥案晴日照茶巾幽興殊未盡東城飛
暮塵

贈張道者

採藥三山罷乘風五日歸剪荷成舊屋剉蘖染新
衣玉粒指應久丹砂驗不微坐看青節引更與白
雲飛

題蘇許公林亭

平津東閣在別是竹林期萬葉秋聲裏千家落照
時門隨深巷靜窓過遠鍾遲客舍苔生處依依又
賦詩

送元詵還江東

過江秋色在詩興與歸心客路隨楓岸家人掃橘
林潮聲當晝起山翠近南深幾日華陽洞寒光引
獨尋

送客遊江南

桂水隨去遠賞心知有餘衣香楚山橘手鱸湘波
魚芳芷不共把浮雲悵離居遙想汨羅上弔屈秋
風初

送海州姚別駕

少年爲長史東去事諸侯坐覺千閭靜閒隨五馬
遊行人楚國道暮雪鬱林州他日知相憶春風海
上樓

送夏侯審

謝公鄰里在日夕望佳期春水人歸後東田花盡

時下樓閒待月行樂笑題詩他日吳中路千山入
夢思

送趙評事赴洪州使幕

孤舟行遠近一路過湘東官屬張廷尉身隨杜幼
公山河映湘竹水驛帶青楓萬里思君處秋江夜
雨中

送李侍御赴徐州行營

少年兼柱史東至舊徐州遠屬平津閣前驅博望
侯向營淮月滿吹角楚天秋客夢依依處寒山對
白樓

送李秀才歸江南

過淮芳草歇千里又東歸野水吳山出家村越鳥
飛荷香隨去棹梅雨點行衣無數蒼江客如君達
者稀

題僧房

披衣聞客至關鎖此時開鳴磬夕陽盡捲簾秋色
來名香連竹徑清梵出花臺身在心無住他方到
幾回

送壽州陳錄事

壽陽南渡口歛笏見諸侯五雨楚雲暮千家淮水

秋開簾對芳草送客上春洲請問山中桂王孫幾
度遊

送趙陸司兵歸使幕

客路青蕪遍開城白日低身趨雙節近名共五齊
齊遠水公田上春山郡舍西無因得携手東望轉
悽悽

送蔣員外端公歸淮南

淮南芳草色日夕引歸船御史王元貺郎官顧彥
先光風千日暖寒食百花燃惆悵佳期近澄江與
暮天

題慈仁寺竹院

千峰對古寺何異到西林幽磬蟬聲下閑窓竹翠
陰詩人謝客興法侶遠公心寂寂爐煙裡香花欲
暮深

贈鄆州馬使君

東方千萬騎出望使君時暮雪行看盡春城到暮
遲路人趨墨幘官柳度青絲他日鈴齋內知君亦
賦詩

送張丞歸使幕

獨受主恩歸當朝似者稀玉壺分御酒金殿賜春

衣拂席流鶯醉鳴鞭驂馬肥滿臺簪白筆捧手戀
清暉

贈長洲何主簿

掛席逐歸流依依望虎丘殘春過楚縣夜雨宿吳
州野寺吟詩入溪橋折筍游到官無一事清靜有
諸侯

送崔過歸淄青幕府

平陵車馬客海上見旌旗舊驛千山下殘花一路
時春衣過水冷暮雨出關遲莫道青州客迢迢在
夢思

田倉曹東亭夏夜飲得春字

薛公門下人公子又相親玉佩迎初夜金壺醉老
春葛衣香有露羅幕靜無塵更羨風流外文章是
一秦

贈王逖

端隨事龍樓思閑輒告休新調赭白馬暫試黑貂
裘珠履迎佳客金錢與莫愁座中豪貴滿誰道不
風流

送深州吳司馬歸使幕

東門送遠客車馬正紛紛舊識張京兆新隨劉領

軍行駘看暮雨歸鴈踏青雲一去藁臺北佳聲幾
日聞

華亭夜宴庾侍御宅

世故他年別心期此夜同千峰孤燭外片雨一更
中酒客逢山簡詩人得謝公自憐驅匹馬拂曙向
關東

送客之上谷

地客悲秋色田園憶去來披衣朝易水匹馬夕燕
臺風剪荷衣碎霜迎栗罅開賞心知不淺累月故
人杯

同中書劉舍人題青龍上方

西掖歸來後東林靜者期
遠峰春雪裏寒竹暮天
時笑說金人偈聞聽寶月詩
更憐茶典在好出下方遲

宴吳王宅

玉管簫聲合金盆酒色殷
聽歌吳季札縱飲漢中山
稱壽爭離席留歡輒上關
莫言辭客醉猶得曳裙還

題薦福寺衡嶽暎師房

春城乞食還高論此中間
僧臘階前樹禪心江上

山踈簾看雪卷深戶映花關
晚送門人出鍾聲杳靄間

送戴迪赴鳳翔幕府

青春帶文綬去事魏征西
上路金羈出中人玉筋
齊當歌酒萬斛看獵馬千蹄
自有從軍樂何須怨解携

送郢州郎使君

千人插羽迎知是范安城
暮雪楚山冷春江漢水
清紅鮮供客飯翠竹引舟行
一別何時見相思芳草生

送李中丞赴辰州

白羽逐青絲翩翩南下時
巴人迎道路蠻帥引旌
旗暮雨山開少秋江葉落遲
功成益地日應見竹
郎祠

送劉侍御赴陝州

金羈映驕驕後騎佩干將
把酒春城晚鳴鞭曉路
長帶冰新溜澁間雪早梅香
明日懷賢處依依御
史牀

李中丞宅夜宴送丘侍御赴江東

積雪臨階夜重裘對酒時
中丞違沈約才子送丘

遲一路三江上孤舟萬里期
辰州佳興在他日寄
新詩

送李侍御歸宣州使幕

春草東江外翩翩北路歸
官齊魏公子身逐謝玄
暉山色隨行騎鶯聲傍客衣
主人池上酌携手暮
花飛

東城水亭宴李侍御史副使

東門留客處沽酒用錢刀
秋水牀下急斜暉林外
高金羈絡驤裏玉匣閉豪曹
去日隨戎幕東風見
伯勞

送秘書謝監赴江西使幕

謝監憶山程辭家萬里行
寒衣傍楚色孤枕宿潮聲
小寇不足問新詩應漸清
府公相待日引旆出江城

送江陵元司錄

新領州從事曾爲朝大夫
江城竹使待山路橘官扶
片雨三江道殘秋五葉湖
能令詩思好楚色與寒蕪

送李舍人携家歸江東覲省

二十青官吏成名似者稀
承顏陸郎去携手謝娘歸
夜月回孤燭秋風試夾衣
扁舟楚水上來往速如飛

送劉侍御赴令公行營

東城躍紫騮西路大刀頭
上客劉公幹元戎郭細侯
一軍偏許國百戰又防秋
請問蕭關道胡塵早晚收

送蘇州姚長史

江城驛路長煙樹過雲陽
舟領青絲纜人歌白玉郎
葛衣行柳翠花簾宿荷香
別有心期處湖山滿訟堂

送金華王明府

縣舍江雲裏心間境又偏
家貧陶令酒月俸沈郎
錢黃蘖香山路青楓暮
雨天時聞引車騎竹外
尚銅泉

送田舍曹汴州覲省

拜慶承天寵朝來辭漢宮
玉杯分湛露金勒借追
風古驛秋山下平蕪暮
雨中翩翩魏公子人看渡
關東

送張渚赴越州

白面誰家郎青驪照地光
桃花開綬色蘇合借衣

香暮雪連峰近春江海市長風流似張緒別後見
垂陽

奉和元相公家園即事寄王相公

共列中台貴能齊物外心
回車青閣晚解帶碧茸
深寒水分畦入晴花度竹
尋題詩更相憶一字重
千金

送道士姪歸池陽

銀角桃杖杖東門贈別初
幽州尋馬客灞岸送驢
車野飯秋山靜行衣落照
餘燕南群從少此去意
何如

送營城李少府

懷祿兼就養更懷趨府心晴山東里近春水北門
深新綬映芳草舊家依遠林還乘鄭小駟躑躅縣
城陰

魯中送魯使君歸鄭州

城中金絡騎出餞沈東陽九月寒露白六關秋草
黃齊謳聽處妙魯酒把來香醉後着鞭去梅山道
路長

送夏侯校書歸上都

後輩傳佳句高流愛美名青春事賀監黃卷問張

生暮雪重裘醉寒山疋馬行此回將詣關幾日諫
書成

送李明府赴連州

萬里回南湘孤舟入桂陽諸侯近上客小吏拜官
郎春報橦花細初筵木槿芳看承雨露速不待荔
枝香

送盧大理趙侍御祭東嶽兼寄孟兗州

東嶽昔有事兩臣朝望歸驛亭開歲酒齋舍着新
衣上客鍾大理主人陶武威仍隨御史馬山路滿
光輝

送皇甫大夫赴浙東

舟師分水國漢將領秦官麾下同心吏軍中
端吳門秋露濕楚驛暮天寒豪貴東山去風流勝
謝安

送韋秀才

東人相見罷秋草獨歸時幾日孫弘閣當年詩眺
詩寒山葉落早多雨路行遲好憶金門步功名自
有期

五言排律

家兄自山南罷歸獻詩叙事

時輩已爭先吾君未着鞭空嗟鑷鬚日獨是屈腰
年不以殊方遠仍論賞地偏襄櫟隨客路漢竹引
歸船雲木巴東峽林中峴北川池餘騎馬處宅是
臥龍邊夜簟千峯月朝窓萬井煙朱荷江女院青
稻楚人田縣舍多瀟灑城樓得醉眠黃苞柝正熟
紅縷鱠仍鮮坐厭牽絲倦因從解綬旋初辭五斗
米唯奉一囊錢室愛生虛白書耽守太玄櫪中嘶
欵段階下引潺湲落照淵明柳春風叔夜絃絳紗
儒客帳丹訣羽人篇雅論承安石新詩與惠連興
清湖見底襟豁霧開天魏闕心猶繫周才道豈捐

一丘自無逸三府會招賢

寄贈號州張參軍

三十事諸侯賢豪冠北州
桃花迎駿馬蘇合染輕裘
觀妓將軍第題詩關尹樓
青林朝送客綠嶼晚回舟
好栗分通子名香贈莫愁
洗杯新酒熟把燭故人留
百雉歸雲過千峯宿雨收
蒹葭露下晚菡萏水中秋
憶昨陪行樂常時接獻酬
佳期雖霧散惠問亦川流
開卷醒堪解含毫思苦抽
無因達情意西望日悠悠

奉送王相公赴幽州

黃閣開帷幄丹墀侍冕旒
位高湯左相權總漢諸侯
不改周南化仍分趙北憂
雙旌過易水千騎入幽州
塞草連天暮邊聲動地秋
無因隨遠道結束佩吳鉤

赴李中丞赴商州

五馬渭橋東連嘶逐曉風
當年紫髯將他日黑頭公
不異金吾寵兼齊玉帳雄
關營春雪下吹角暮山空
香麝松陰裏寒猿黛色中
郡齋多賞事好與故人同

韓君平集卷中

韓君平集卷下

七言律詩

送客一歸襄陽二歸潯陽

南驅匹馬會心期
東望扁舟愜夢思
斗山前春色早香
爐峰頂暮煙時
空林欲訪新居士
古寺應懷遠法師
兩地由來堪取興
三賢他日幸留詩

送故人赴江陵尋瘦牧

主人持節拜荊州
走馬應從一路遊
斑竹岡連山雨暗
枇杷門向楚天秋
佳期笑把齋中酒
遠意閒登城上樓
文體此時看又別
吾知小庾甚風流

送客水路歸陝

相風竿影曉來斜渭水東流去不賒枕上未醒秦
地酒舟前已見陝人家春橋楊柳應齊葉古縣棠
梨也作花好是吾賢佳賞地行逢三月會連沙

送丹陽劉太真

長干道上落花朝羨爾當年賞事饒下筇已憐鵝
炙美開籠不柰鳴媒嬌春衣晚入青楊巷細馬初
過皂莢橋相訪不辭千里遠西風好借木蘭橈

送客歸江州

東歸復得采真遊江水迎君日夜流客舍不離青

雀舫人家舊在白鷗洲風吹山帶遙知雨露濕荷
裳已報秋聞道泉明居止近藍輿相訪會淹留

題張逸人園林

藏頭不復見時人愛此雲山奉養真露色點衣孤
嶼曉花枝妨帽小園春時携幼稚諸峰上閑濯眉
鬚一水濱興罷歸來還對酌茅簷掛着紫荷巾

送劉將軍

明光細甲照 鍛昨日承恩拜虎牙膽大欲期姜
伯約功多不讓李輕車青巾校尉遙相許墨綃將
軍大莫誇闕下來時親伏奏胡塵未盡不爲家

送鄭員外

風流不減杜陵時五十爲郎未是遲
孺子亦知名下士樂人爭唱卷中詩
身齊吏部還多醉心顧尚書自有期
要路眼看知已在不應窮巷久低眉

題張逸人園林

花源一曲映茅堂清論閒階坐夕陽
塵尾手中毛已脫蟹螯樽上味初香
春深黃口傳窺樹雨後青苔散點墻
更道小山宜助賞呼兒舒簟醉巖芳

寄徐州鄭使君

江城五馬楚雲邊不羨雍容畫省年
才子舊稱何

水部使君還繼謝臨川射堂草遍收
殘雨官路人稀對夕天雖卧郡齋千
里隔與君同見月初圓

送襄垣王君歸南陽別墅

都門霽後不飛塵草色萋萋滿路春
雙兔坡東千室吏三鴉水上一歸人
愁眠客舍衣香滿走渡河橋馬汗新
少婦北來多遠望應知蟠子上羅中

送王誕渤海使赴李太上行營

少年結客散黃金中歲連兵掃綠林
渤海名王曾折首漢家諸將盡傾心
行人去指徐州近飲馬回看泗水深
喜見明時鍾太尉功名一似舊淮陰

送王少府歸杭州

歸州一路轉青蘋更欲隨潮向富春吳郡陸機稱
地主錢塘蘇小是鄉親葛花滿地能消酒梳子同
心好贈人早晚重過魚浦宿遙憐佳句篋中新

贈王隨

青雲自致晚應遙朱邸新昏樂事饒飲罷更憐雙
袖舞試來偏愛五花驕帳裏爐香春夢曉堂前燭
影早更朝更說毬場新雨歇王孫今日定相邀

題仙遊觀

仙臺下見五城樓風物淒淒宿雨收山色遙連秦

樹晚砧聲近報漢宮秋疎松影落空壇靜細草香
間小洞幽何用別尋方外去人間亦自有丹丘

訪王起居不遇留贈

雙龍闕下拜恩初天子令君注起居載筆已齊周
右史論詩更事謝中書行聞漏滴隨金仗入對爐
煙侍玉除賀客自知來獨晚青驪不見意如何

送劉評事赴廣州使幕

征南官屬似君稀才子當今劉孝威蠻府參軍趨
傳舍交州刺史拜行衣前臨瘴海無人過卻望衡
陽少鴈飛爲報蒼梧雲影道明年早送客帆歸

送冷朝陽還上元

青絲紵引木蘭船名遂身歸拜慶年落日澄江鳥
榜外秋風踈柳白門前橋通小市家林近山帶平
湖野寺連別後依依寒食裏共君攜手在東田

送高別駕歸汴州

信陵門君識下偏駿馬輕裘正少年寒雨送歸千
里外東風沉醉百花前身隨玉帳心應愜官佐銅
符勢又全又客未知何計是參差去借汶陽田

送康洗馬歸滑州

腰佩雕弓漢射聲東歸銜命見雙旌青絲玉勒康
侯馬孟水金隄滑伯城臘雪夜看宜縱飲寒蕪晝
獵不妨行懷君又隔千山遠別後春風百草生

寄上田僕射

家封薛縣異諸田報主榮親義兩全僕射臨戎謝
安石大夫持憲杜延年金裝晝出羅千騎玉案晨
食直萬錢應念一身留闕下闔門遙寄魯西偏

送王光輔歸青州兼寄儲侍郎

幾回奏事建章宮聖主偏知漢將功身著紫衣趨
闕下口銜丹詔出關東蟬聲驛路秋山裏草色河
橋落照中遠憶故人滄海別當年好躍五花駘

宴楊駙馬山池

垂楊拂岸草茸茸繡戶簾前花影重
鱗下玉盤金縷細酒開金甕綠醅濃
中朝駙馬何平叔南國詞人陸士龍
落日泛舟同醉處回潭百丈映千峰

送長史李少府入蜀

行行獨出故關遲南望千山無盡期
見舞巴童應暫笑聞歌蜀道又堪悲
孤城晚閉清江上匹馬寒嘶白露時
別後此心君自見山中何事不相思

送端州馮使君

白晳風流似有鬚一門豪貴領蒼梧
三峰亭暗橘邊宿八桂林香節下趨
玉樹群兒爭翠羽金盤少妾揀明珠
懷君樂事不可見驥馬翩翩新虎符

送王府張參軍附學及第東歸

鄰家不識鬪雞翁閉戶能齊隱者風
顧步曾爲小山客成名因事大江公
一身千里寒蕪上單馬重裘臘月中
寂寂故園行見在暮天殘雪洛城東

送齊明府赴東陽

綠絲帆桂爲塙過盡淮山楚水長
萬里移家背春穀一官行府向東陽
風流好愛杯中物豪蕩仍欺陌上郎
別後心期如在眼猿聲煙色樹蒼蒼

韓仲平集卷九
九
魯中送從事歸滎陽

故園衰草帶滎波歲晚知如君思何輕橐歸時魯
縞滿寒衣縫處郵綿多萬人都督鳴騶送百里邦
君在騎過累路盡逢知已在曾無對酒不高歌

送李明府使蘇州便赴告期

莫言水國去迢迢白馬吳門見不遙楓樹林中經
楚雨木蘭舟上蹋江潮空山古寺千年石草色寒
隄百尺橋早晚盧家蘭室外珊瑚玉佩徹青霄

送田明府歸終南別業

故園此日多心賞窓下泉流竹外雲近館應逢沈
道士北鄰自識下田君離宮樹影登山見上苑鍾
聲過雪聞相勸早移丹鳳闕不須常戀白鷗群

五言絕句

漢宮曲二首

駿馬繡障泥紅塵撲四蹄歸時何太晚日照杏花

西

繡幕珊瑚鈞春關翡翠樓深情不肯道嬌倚鈿箜
篋

陪孟都督祭嶽途中有贈

封疆七百里祿秩二千石擁節祠太山寒天霜草

白

六言

宿甌山

山中今夜何人門下當年近臣青瑣應須早去白雲何用相親

別甌山

一身趨侍丹墀西路翩翩去時惆悵青山綠水何年更是來期

送陳明府赴淮南

年華近過清明落日微風送行黃鶯綿蠻芳樹紫

騶躐蹀東城花開一杯促膝煙外千里含情應渡淮南信宿諸侯擁旆相迎

七言絕句

送客知鄂州

江口千家帶楚雲江花亂點雪紛紛春風落日誰相見青翰舟中有鄂君

寒食

春城無處不飛花寒食東風御柳斜日暮漢宮傳蠟燭青煙散入五侯家

羽林騎

駿馬牽來御柳中
鳴鞭欲向渭橋東
紅蹄亂踏春城雪
花領驕嘶上苑風

看調馬

鴛鴦赭白齒新齊
晚日花中散碧蹄
玉勒斗回初噴沫
金鞭欲下不成嘶

寄贈衡州楊使君

湘竹斑斑湘水春
衡陽太守虎符新
朝來笑向歸鴻道
早晚南飛見主人

宿石邑山中

浮雲不共此山齊
山靄蒼蒼望轉迷
曉月暫飛高

樹裏秋河隔在數峰西

江南曲

長樂花枝雨點銷
江城日暮好相邀
春樓不閉歲蕤鎖
綠水回連宛轉橋

贈張千牛

蓬萊闕下是天家
上路新回白鼻騮
急管晝催平樂酒
春衣夜宿杜陵花

漢宮曲

五柞宮中過臘看
萬年枝上雪花殘
綺窓夜閉玉堂靜
素綆朝穿金井寒

贈李翼

王孫別舍擁朱輪不羨空名樂此身
門外碧潭春洗馬樓前紅燭夜迎人

漢宮曲

漢室長陵小市中珠簾繡戶對春風
君王昨日移仙仗玉輦將迎入漢中

少年行

千點爛熯玉勒驄青絲結尾繡纏驥
揮鞭晚出章臺路葉葉春衣楊柳風

題玉真觀李祕書院

白雲斜日影深松玉宇瑤壇知幾重
把酒題詩人散後華陽洞裡有疎鍾

送客之潞府

官柳青青匹馬嘶迴風暮雨入銅鞮
佳期別在春山裏應是人參五葉齊

送客泛五溪

南過猿聲一逐臣回看秋草淚沾巾
寒天暮雪空山裏幾處蠻家是主人

送齊山人歸長白山

舊事山人白兔公掉頭歸去又乘風
柴門流水依

然在一路寒花萬木中

寄裴鄆州

烏紗靈壽對秋風
悵望浮雲濟水東
官樹陰陰鈴閣暮
州人轉憶白頭翁

雜言

河上寄故人

河流曉天濮水清
煙日暖昆吾臺上春
深颯頊城邊鶯聲亂
凋鴻花片細點龍泉
西望情人早至猶應
得醉芳年

韓君平集卷下終

